


October 1936.

No. 49.

Taoe ka 5.



SAM KAUW GWAT PO

Orgaan dael Batavia Buddhist Association,
Gatton, Sam Kauw Hwe Batavia,
Monado dan Telukbetong

ISINJA INI NUMMER:

KARAJAAN KHONG KAUW DI KOREA (Dengen gambaran),
MILIK DAN KAKAJAAN KLENTENG-KLENTENG TIONGHOA.
BUDDHISME DENGEN POLYOAMY (Oleh Nanda L. Puri).
BUDDHA POENJA AMPAT KARENTERAN MOELIA (Lezing XVIII
dan XIX) oleh K.T.H.

PHILOSOPIE BUDDHA TENTANG KALAHURAN DAN KAMATIAN,
oleh Bhikkhu Narada.

Rubaiyat dari OMAR KHAYYAM

Menoeroet salinanaja Edward FitzGerald

Ditoetoerken ka dalem Melojos Rendah, dan
diterangkan maksoednya dengan loeas

Oleh Kwae Tex Hooi.

Sama sekalih dalem ini boekoe ada dimuat 113 ajiran ditoeroenken dari bahasa Inggris menoeroet FitzGerald dan Whinfield, dengan berikuet keterangan jang terkadang boeat perjahren maksoednya zatoe pata ajiran moesti mengambil tempat sampe zatoe pagina stawa lebih.

Djoega dalem lioe boekoe ada dimuat riwayat dari kahidoepaanja Omar Khayyam dan pemandangan ringkes leutang lapoenja toedjoean dalem filosofie dari kahidoepaan.

Desarua lioe boekoe 21×14 c.M. dan tebelnya sama sekalih ada terdiri dari 140 pagina, terdjild dengan didjait, bojang, serta carlon tebel dan omslag indah, bagoes sekalih boeat perhiasan lemari boekoe. Harga per djillid fl 2,50 dikkisim franco aangeleekend.

*Sangat berfaedah dan goemilang tsinja,
Tjorhoep indah dan menenangkan djilitiunja.
Membikin jang pora a djadi merasa bangga.
Kapan dihadichken pada sobat-sobat aken-djadi tanda
Jang tinggal dilaget dan daargain selama-lamanya.*

BOEKHANDEL „MOESTIKA“

Tjiljoeroeg.

Karaja'an Khong Kauw di Korea.

Dalem tjatetan dari agama-agama, bangsa Korea dianggep menganoet Khong Kauw berikoet pamoedjaan pada roh leloehoer, maslai ada ketjampoeran djoega dengan kapertjaja'an pada djin atawa selan djahat.

Køetika itoe negri masih mempoenjai Keizer sendiri, agama officieel ada Khong Kauw, dan samoea pembesar-pembesar negri diwadjibken dalem moesim-moesim jang tentoe, dan teroetama di harian lahir dan wafatnya Khong Tjoë, melakoeken oepatjara sembahjang di dalem Boen Bio jang ada terdapat ampir pada saban kota-kota besar dan ketjil di itoe negri.

Sadari Korea, jang sekarang diseboet Chosen, menjadi djaduhanan Japan, itoe kabiasaan akan menghormat pada Khong Tjoë antara pembesar-pembesar Korea dan orang-orang sastrawan masih berdjalanan heroes.


Salaenna dari oepatjara sembahjangan besar, itoe karaja'an ada dirameken djoega dengan muziek, sebab Khong Tjoë poen hargaken tinggi pada muziek.

Tetapi itoe muziek jang diboenijken boekan bersifat modern, hanja tjara djaman doeloe dengan instrument-nya poen serba koeno dan sabagian ada berbeda dari jang biasa tertampak di Tiongkok.

Gambar di sabelah ini mengoendjoekken sarombongan pembesar-pembesar Korea dengan pakean kabangsa'an bersama pekakas muzieknya koetika ambil bagian dalem karaja'an akan menghormatken Khong Tjoë.

Comite Boen Bio Soerabaja poenja bagian Khong Kauw poen soedah adaken djoega afdeeling Yang-kim jang maskipoen berdirinja belon berapa lama soedah bisa kasih denger muziek-muziek Tionghoa satjara memoearken.

Nmoe muziek memang ada salah-satoe peladjaran jang dioetamaken oleh Khong Tjoë, hingga amat pantas dan tʃotjok kapan satoe Khong Kauw Hwe adaken afdeeling muziek Tionghoa jang toelen dan maenken lagoe-lagoe klassiek.



MENGHORMATKEN KHONG HOE TJOE
DI KOREA.

PEMBESAR PEMBESAR KOREA DENGEN MUZIEK-
NJA JANG DIKASIH MAEN DALEM TEMPEL DARI
KHONG TJOE ATAWA BOEN BIO.

Sam Kauw Gwat Po.

三 教 月 報

ORGAN DARI BATAVIA BUDDHIST ASSOCIATION,
SAM KAUW HWE BATAKIA, MENADO,
DAN TELOKBETONG.

ISINJAINI MAANDBLAD ADA DIOEROES DAN DITANG-
GOENG OLEH REDACTIE „MOESTIKA DHARMA.”

Harga abonnement per kwartaal f 0,75. Pembajaran dimoeka.
Kaloe berlangganan dirangkep sama Moestika Dharma atau
Moestika Romins boeat ini maandblad tjoemah tambah per-
kwartaal f 0,50. Harga advertentie boleh berempoek.

Kantoor Redactie Administratie: Tjitjoeroeg, Preanger.

Milik dan Kakaja'nnja Klen- teng-klienteng Tionghoa.

Klienteng-klienteng Tionghoa di Indonesia, biarpoen jang paling besar dan termashoer, oemoemna tjoemah sedikit sekalih jang mempoenjai milik, kakaja'an atawa penghatsilan tetep jang berdjoemblaah besar. Hatsil teroetama jang didapet oleh satoe krenteng adalah dari pengasilannja orang-orang jang dateng sembahjang, aken moehoen berkah, minta obat, tanja peroentoengan, atawa membajar kaoel kapan mak-soednya soedah terkaboele. Tetapi ini penghatsilan tida bisa tetep, dan djoega tida perna diadaken tjetetan dan kas jang pasti boeat koempoe dan control kada'nnja oewang jang masoek, dan ongkos jang digoenkaken. Boeat krenteng-klienteng oemoem, itoe kahatsilan sabagian ada djatoh di tangannja bio-kong atawa pendjaga krenteng, jang sasoedahnja pake sabagian oentoek membeli lilin dan hio dan laen-laen kaperloeaan ketjil-ketjil, sisanja digoenkaken oentoek kaperloeannja sendiri, dengen ampir tida ada jang tilik

berapa besaritja itoe oewang jang masoek pada satiap boelan atawa taon. Kapan itoe krenteng bersifat particulier, oepama diberdiriken dan d'eroes oleh satoe pakoempoelan atawa satoe familie jang poengoet sendiri antero kahatsilannja, terkadang ada djoega jang memberi kaoentoengan bagoes hingga mendjadi sabagi barang reboelan oleh orang-orang jang merasa ada poenja hak, dan malah Krenteng di Welahan bersama Toapekongnya soedah perna didjoeal dengan lelang soepaja bisa petjah warisan antara orang-orang jang ada hak aken dapat bagian dari penghatsilannja.

Tetapi krenteng-krenteng oemoem, jang diberdiriken atas toendjangannya pendoedoek di masing-masing tempat, djarang sekalih jang mempoenjai hatsil tjoek koep besar hingga, sasoedah dipake ongkos-ongkos jang perlœ, masih ada kalebihannja boeat disimpen. Boekan sadja itoe kahatsilan, terlebih poelah di ini masa, tambah lama semingkin soesoet, tapi djoega seperti di atas soedah dibilang ampir tida ada penilikian sama sekalih, hingga itoe oewang kalebihan, djikaloe ada banjak sisanja, samoea masoek di sa-koenja bio-kong atawa pendjaganja jang biasa melajinin orang jang dateng sembahjang. Betoelsasoeatoe krenteng oemoem ada mempoenja badan pengeroes atawa comite jang terdiri dari orang-orang dagang dan golongan pantes, tetapi marika poenja kawadjiban kabanjakan ada boeat mengatoer karaja'an atawa sembah-jangan besar, atawa poengoet oeroenan kapan krenteng perlœ oewang. Penilikian atas derma'annja orang-orang jang dateng sembahjang boleh dibilang tida ada sama sekalih. Tjoemah pada beberapa krenteng ada sedia satoe fonds-ketjil, jang dinamain „Doeit Toapekong," jang biasa dikasih orang pindjem sabagi wisit oentoek berdagang dan laen-laen kaperloean dalem djoemblah ketjil, di bawah dari f 1,00, dan kapan si pemindjem berhatsil, itoe oewang dibajar

KAKAJA'ANNJA KLENTENG TIONGHOA.

poelang dengen beberapa lipet lebih besar sabagi tanda soekoor. Ini kas tjoemah diboeke saban taon satoe kalih, biasanya di wakoe sore dari Tjiagwee Tjapgauw, pada wakoe mana ada diberi kasempatan aken orang nemindjem atawa poelangken pindjeman dari taon laloe, jang samoea ada tertjate' dalem satoe boekoe. Katjoeali ini satoe matjem kas, boleh dibilang pada kabanjakan krenteng Tionghoa tida ada tersedia fonds apa-apa, kerna saban kalih perloe oe-wang jang berdjoemblah sedikit besar, oepama mem-betoelin karoесakan, bikin sembahjang Tjhit-gwee dan laen-laen lagi, pengeroesnya biasa poengoet oeroenan antara orang orang jang soedjoet dan pertjaja pada itoe Toapekong. Djadinja jang ada di bawah penilikan lang-soeng dari Comite krenteng hanja pemoengoetan dan pemakean dari itoe oe-wang oeroenan satiap taon, jang pada tempat-tempat besar djoemblahnja ada loemajan djoega. Dengan lakoeken penghimatan pada ongkos pembetoelan dan sembahjangan, orang bisa djoega mempoenjai, kaledihan aken dikasih masoek dalem kas reserve dari itoe krenteng, tetapi ini matjem kas, djikaloe ada, tida bisa kekel atawa beres, lantaran tida ada atawa koarangnya penilikan dari fihak publiek. Itoe badan pengeroes dari roemah-roemah Toapekong tida bekerdjya menoeroet satoe atoeran tetep, kerna tida ada statuten atawa laen-laen reglement, hanja mengikoetin sadja adat kabiasaan, dari djaman koeno dimana segala apa ada bergantoeng atas *kapertjaja-an* pada marika poenja kadjoedjoeran. Di banjak tempat malah itoe badan pengeroes boekan dipilih oleh publiek, hanja disertahin atas poetoesan dari Toapekong sendiri, jang kasih liat kainginannja dengan djalan *pwa-pwe*, dan orang jang dipilih tida boleh menolak. Dan tambahan lagi, seperti kabiasa'nnja orang Tionghoa jang terima pakerdra'an dengen satengah dipaksa, satoe sama laen maen saling andelin,

tida lakoeken kawadjibannja dengen soenggoe hati, hingga kapan satoe koetika dalem itoe badan pengoe-roes ada kamasoekan orang jang temaha, boekan djarang kadjadian itoe oewang miliknya krenteng, kapan berdoemblaah loemajan, mendjadi tida beres, atawa . . . , moesna dimakar rajap !

Maski begitoe, masih ada djoega beberapa krenteng Tionghoa jang mempoenjai milik, kahatsilan atawa fonds jang boleh dibilang besar. Oepama krenteng di Menado, seperti kita perna toelis sedikit dalem ini orgaan penerbitan April 1938, ada poenja oewang contant riboean roepiah dan beberapa potong tanah jang, menoeroet verslag taon 1936, memberi peng-hatsilan kira f 4000, hingga itoe oewang bisa digoena-ken oentoek menoeloeng orang miskin jang kamati-an, menoendjang sekola particulier, ongkosin beladjar pa-da student jang koerang mampoe, dan laen-laen lagi.

Pengoeroes dari miliknya itoe krenteng di Menado, jang pake nama „De Chineesche Gemeente Toape-kong”, dalem mana Kapitein Tionghoa di Menado, Toean Lie Goan Oan, ada djadi voorzitter, tida bisa disangka lagi ada berboeat baek dan bener dengen goenaken itoe oewang kahatsilan oentoek kapentingan dan kabaekannja Gemeente Tionghoa di Menado. Tetapi sabagitoe djaoe jang dapet diliat dari boenjinja itoe verslag jang dibikin ampir doea taon laloe, ma-sih ada apa-apa dalem pemakeannja itoe oewang jang haroes diperbaeki. Itoe milik dan kahatsilan dari Krenteng Menado ada bersifat Agama, maka saharoes-nja djikaloe boekan saantero, sedikitnja sabagian be-sar atawa poen saparonja, digoena-ken *oentoek Agama*, jaitoe Agama dari bangsa Tionghoa jang boekan sa-dja termasoek pamoeidja'an pada Toapekong berkoet segala oepatjara dan sembahjangannja, tapi djoega jang berhoeboeng dengan Sam Kauw, jaitoe peladjaran philosofie dari Khong Tjoe, Buddha dan Loo Tjoe.

KAKAJA'ANNJA KLENTENG TIONGHOA.

Di Menado soedah lama berdiri satoe Sam Kauw Hwe, jang satiap boelan adaken lezing-lezing, terkadang dalem clubgebouw Tjhing Lian Hwe, satoe tempo dalem roemah pakoempoelan Kong Tik Soe, dan terkadang di roemah-roemah orang particulier. Ada hal jang tjetjok dan pantes sekalih djikaloe itoe fonds dari Krenteng Menado digoenaaken oentoek adaken saoe roangan dalem itoe krenteng sendiri, atawa poen berdiriken gedong terpisah di laen tempat, oentoek Sam Kauw Hwe beriken lezing-lezingnya aken goena oemoem. Djoega ada *pantes* dan *tjetjok* djikaloe sabagian dari itoe kahatsilan dipake bajar gadjinja orang jang meloeloe bekerja sabagi propagandist dari Sam Kauw, atawa mengadjar Agama dan philosophie Tionghoa antara moerid-moerid klas tinggian dari H.C.S., Haktong atawa laen-laen sekola jang ada di bawah pengeroesan bangsa Tionghoa, soepaja itoe anak-anak moeda bisa kenal, ketarik dan menaro harga, pada agama leloehoernja sendiri. Mahal perloe djoega diberi toendjangan pada orang-orang moeda jang hendak peladjarin agama dan philosophie Tionghoa, teroetama Sam Kauw, djikaloe di Menado belon bisa diberdiriken sekola Sam Kauw jang tetep. Kapan kadapetan orang-orang jang soedjoet dan ada aanleg boeat peladjarin ilmoe kabatinan, itoe kas Toapekong haroes menoendjang gøena sampeken maksoednja dengen pergi beladjar ka laen tempat, oepama pergi ka Ceylon boeat beroeroe pada Bhikkhu Namada, atawa ka laen-laen tempat lagi.

Pendeknja ada banjak djalān boeat mana itoe fonds dari satoe krenteng Tionghoa bisa digoenaaken dengan satjara tjetjok dan pantes dalem kalangan *agama* dan *kabatinan* Tionghoa. Jang itoe Fonds Krenteng Menado, menoeroet verslag dari taon 1936, tida digoenaaken oentoek ini maksoed, itoelah ada satoe kakoorangan jang haroes ditambahi dan diperbaekin. Maka pada

Bestuur Sam Kauw Hwe Menado kita harep soepaja soeka ambil tindakan satjara manis dan pantes boeat minta Bestuur dari De Chineesche Gemeente Toapekong soekat taro perhatian djoega pada kapentingan-nya gerakan oentoeck memadjoeken Agama Tionghoa, jang djoestroe ada lebih tjetjok dan satimpal dengen toedjoean dari satoe pakoempoelan jang mengoeroes milik dan kahatsilannja roemah Toapekong.

Laen krenteng lagi jang kabarnja mempoenjai milik dan kahatsilan besar ada terdapat di salah satoe tempat di bilangan Sumatra. Menoeroet kabar jang kita terima, oewang kahatsilannja itoe krenteng moesti soedah ada bilang riboe atawa poen bilang poeloeh riboe roepiah, tetapi katanja tida perna digoenaken sabagimana moestinja. Itoe krenteng ada poenja milik beroepa perceel-perceel dengen roemah-roemah sewanan jang memberi penghatsilan tetep, dan jang djadi President dan Penningmeester dari itoe krenteng ada satoe officier, kepala dari bangsa Tionghoa di itoe tempat, jang kabarnja soedah kekepin itoe oewang teroes-meneroes dengen tida perna kasih peritoengan, dan di loearan orang berbisik dalem ini hal ada apa-apa jang tida beres. Tapi itoe officier pada beberapa boelan laloe telah letakin djabatannja dan itoe tempat sekarang dapet Kepala dari bangsa Tionghoa jang baroe. Maka djikaloe apa jang orang sampeken pada kita ternjata bener — itoe krenteng sasoenggoenja mempoenjai milik berharga jang memberi penghatsilan beberapa ratoes roepiah siap boelan — sekarang, di bawah perentah dari itoe officier jang baroe, ada temponja jang betoel aken pendoedoek Tionghoa disana ambiltindakan soepaja kahatsilan dari itoe krenteng ditilik sabagimana moesti dengen djalan berdiriken s~~toe~~ comite di bawah pimpinan dari Kepala Tionghoa tetapi secretaris dan penningmeester dipilih oleh pendoedoek Tionghoa jang masih soedjoet dan pertjaja pada Toa-

KAKAJA' ANNJA KLENTENG TIONGHOA.

pekong, dan sedikitnya saban taen satoe kalih dikasih peritoengan dari pemasoekan dan pengaloearan oe-wang satjara beres, dengen dioemoemken pada publiek. Dan akerdja'annja itoe Comite boekan tjoemah boeat mengeroes ka'adaan oewang dari itoe Klen-teng, hanja haroes bantoe menjiarken keterangan tentang Agama dan Philosofie Tionghoa dengan beker-dja satjara Sam Kauw Hwe, oepama adaken lezing-lezing satiap boelan dalem itoe klen teng, berdiriken bibliotheek oemoem terdiri dari boekoe-boekoe jang menerangkan peladjaran Khong Tjoe, Buddha, Loo Tjoe dan laen-laen lagi jang tida bertentangan dengan Sam Kauw, soepaja itoe orang orang jang dateng memoedja di Klen teng boekan tjoemah pasang hio dan berloetoet di hadepan Kwan Im atawa Buddha, tapi djoega bisa mengenal hikajat dan atsal-oetsoel dari itoe machloek-machloek soetji jang marika poe-dja, dan mengarti peladjaran jang Buddha siarken oentoek menjelametken manoesia.

Kita taoe antara pendoedoek di itoe tempat dalem golongan toeaan jang masih soedjoet pada Agama leloehoernja, soedah lama ada dikandoeng rasa menjeset dan ketjiwa, lantaran meliat banjak sekalih anak-anak moeda Tionghoa telah memelok agama Roomsch Katholieke dan sabagian lagi menganoetagama Islam. Tetapi ini ada dari salahnja iaorang sendiri, jang tida sedikit poen maoe bergerak boeat menjiarkan atawa bikin terkenal agama Tionghoa di antara orang-orang jang belon mengarti. Satoe soedagar jang mempoenjai barang baek tetapi selaloe disimpen dalem goedang, tida perna diopènin, soedah tentoe tida bisa lakoe, kerna pembeli lebih gampang ketarik pada barang jang didasarken di pinggir straat, direclamein dengen advertentie, dan saban hari ditawarin oleh sadjoemblah verkooper jang pande dan soedah terdidik, soepaja bisa lakoe keras.

Memang samoea agama ada bermaksoed baek, hingga tida djadi halangan aken orang Tionghoa masoek Islam, Kristen, Hindoe, Parsi, agama atawa kapertja-ja'an apa sadja jang ada di doeqnia. Tetapi fihak jang masih soedjoet pada Agama Tionghoa ada poenja kawadjiban aken beri kasemptan pada bangsanja boeat **adjar** kenal itoe philosofie kabatinan dari leloehoernja sendiri, teroetama Sam Kauw. Kapan marika soedah kenal dan masih ketarik pada laen agama, itoelah kita tida oesah menjesel atawa koerang senang, kerna boleh djadi marika pikir dalam itoe agama laen marika bisa dapat kasoejian dan katentreman. Masing-masing orang ada hak penoeh aken memilih agama apa jang disenangin. Tetapi ampir dalam samoea hal dimana kadapelan orang Tionghoa tinggalken agama dari leloehoernja aken memelok agama laen, boekan lantaran ia soedah *tjari taoe* dan *bandingken dengen djelas* jang itoe agama asing ada lebih baek dan lebih mempesken, hanja teroetama kerna ia tida kenal sama sekali pada agamanja sendiri, lantaran tida ada orang jang maoe atawa sanggoep terangin bagimana kabaeakan atawa kafaedahannja, hingga tentoe sadja hatinjá gampang ketarik pada fihak laen jang selaloe mendjalanken segala matjom propaganda. Maka itoe sekarang ada djadi kawadjibannja itoe golongan jang masih mendjoengdjoeng Agama Tionghoa aken ambil tindakan boeat menjiarken Sam Kauw, dan pada tempat-tempat dimana roemah klenteng ada mempoenai panghatsilan tetep jang djoemblahnja loemajah, haroeslah diatober soepaja *sabagian* dari itoe oewang digoenaaken oentoek membikin pelajaran dari Buddha, Khong Tjoe dan Loo Tjoe djadi terkenal, boekan **sadja antara** bangsa Tionghoa, tapi djoega oleh laen-laen bangsa, seperti sekarang Sam Kauw Hwe Batavia dan Batavia Buddhist Association telah berboeat.

Buddhisme dengan Polygamy

OLEH MR. NANDA L. PUNJ.

(Lezing dari Batavia Buddhist Association dalam kienteng Kwan Im Tong pada hari Kemis tanggal 30 Juni 1938, djam 8,30 sore).

Soedara-soedara jang tertjinta,

Pada waktoe ada karaja'an Wezak baroe ini telah terjadi sedikit perbintangan tentang menika dengan satoe atawa tiga istri, dan disitoe ada terjadi sedikit salah mengarti antara publiek jang hadir terhadep ini soeal. Maka itoe sekarang saja ingin terangin dengan lebih loeas satoe per satoe.

Apa jang Mr. Power bilang sabenernja boekan dimaksoedken jang satoe orang boleh menika deingen tiga istri. Artinya jang loeas dari oetjapannja itoe ada sebagai berkoet:

Buddha tida memaksa pada kita aken ikoetin samatjem wet sociaal, hanja membiarin kita atoer sendiri dengen menjotjokin kita poenja kapentingan.

Dalem beberapa agama ada dititahken soepaja pendoedoek di sa'antero doenia moesti menaloek pada samatjem wet sociaal (wet jang mengatoer perhoeboengan dan adat istiadat dalem pergaoelan hidoep) jang tetep dan berlakoe boeat salamanja, dan djikaloë dari lantaran beberapa ka'ada'an marika tida maoe toeroet itoe atoeran, marika ada diantjem aken dilebloesin ka dalem naraka boeat salama-lamanja. Ini matjem pelajaran ternjata ada sanget berbahaja bagi pergaoelan hidoep.

Atoeran dari pergaoelan hidoep moesti dibikin me-noeroet ka'ada'an moraal dan kaoewangan dari itoe pendoedoek negri. Oleh kerna ini ka'ada'an senantiasa berubah, maka itoe wet sociaal poen moesti dirobah soepaja bisa menjotjokin sama pendoedoek negri poenja ka'ada'an dan kakoeatan.

Beberapa abad laloe di Arabia telah diadaken atoer-

an jang saorang prampoean tida boleh bikin kaliatan terboeka di moeka oemoem salah-satoe bagian dari iapoenja toeboeh. Djikaloe ini matjem wet moesti di-ikoetin sekarang dalem ini negri, kasoedahannja orang prampoean tida bisa bekerdja. Pada masa ini di Java atawa Indonesia ka'ada'an oewang dari pen-doedoeknja ada begitoe djelek hingga banjak pram-poean terpaksa moesti bekerdja.

Gadjinja saorang koeli kasar disini ada kira-kira antara 12 sampe 15 cent sahari, jang tida tjoekoep boeat kasih makan pada lima atawa anem anggota dari familienja. Maka sang soeami dan istri doe-doeanja moesti bekerdja kerita djikaloe tida begitoe anak-anaknya nanti mati kalaparan.

Maka djikaloe orang-orang prampoean disini moesti mengikoti itoe matjem wet atawa atoeran jang di-adaken di Arabia di djaman doeloe sekalih, jaitoe toe-toepin ssgenep toeboeh dari orang prampoean, pastilah marika tida bisa bekerdja, lantaran mana anak-anaknya tida bisa dapet tjoekoep makanan boeat didahar. Dengan begitoe ini matjem wet ternjata ada sangat berbahaja boeat didjalanken disini. Begitoelah sama-tjenatno atoeran jang doeloe dianggеп berfaedah di Arabia ada berbahaja boeat dipake disini.

Sekarang tjobalah soedara-soedara timbang itoe wet teñtang pertjerean. Antara bangsa Europa ini wet ternjata tida membahajaken pada orang banjak. Dalem beberapa hal malah boleh djadi ada berfaedah bagi marika. Inilah lantaran ka'ada'an oewang dari bangsa Europa ada begitoe tegoeh hingga biarpoen antara ajah dan iboe terjadi pemisahan, anak-anaknya bisa dipelihara sampe besar dengan satjara jang bener. Saja kenal banjak kadjadian dimana sasoedahnja sang ajah dan iboe hidoe terpisah, itoe anak-anak dapat toendjangan tjoekoep dari ajahnya boeat terima pendidikan dan sabaginja.

LEZING-LEZING DI KWAN IM TONG.

Tetapi disini, di Java, itoe atoeran pertjerean ada mendjadi sebab jang teroetama dari itoe ka'ada'an djelek dari rahajat, lantaran kaoewangan marika ada begitoe roepa hingga satoe ajah atawa iboe dengan sendirian sadja tida bisa pelihara dan didik anak-anak-nja satjara jang pantes.

Natuur soedah atoer kalahiran satoe anak begitoe roepa hingga itoe ajah dan iboe ada dipaksa oleh kakoeatannja tenaga natuur jang beroepa katjinta'an aken memelihara pada sang anak. Maka itoe ada mendjadi wetnja natuur aken ajah dan iboe bekerdja sama-sama boeat menoendjang marika poenja anak. Perijereannja ajah dan iboe ada berarti melanggar pada wet natuur. Itoe matjem pelanggaran sampe di satoe wates bisa diperbaekin dengan kakoeatan oe-wang, dan dalem halnja orang miskin jang tida poenja oewang tentoe sadja itoe anak-anak tida bisa dibikin djadi besar dengan satjara jang pantes.

Kapan ada moentjoel ajah atawa iboe tiri, nistjaja itoe ajah dan iboe jang toelen poen tida bisa taro tjoekoep perhatian pada itoe anak katjoeali marika ada poenja banjak oewang.

Dengen begitoe kita dapet liat bahoea itoe wet perijerean tida banjak meroesak pada orang Europa poenja pergaoelan hidoe, tetapi sanget berbahaja bagj pendoedoek di ini negri.

Disitoe djadi terboekti bahoea samatjem wet jang tida berbahaja pada satoe golongan pendoedoek bisa djadi sanget meroesak pada pendoedoek dari laen golongan.

Di Europa djikaloe itoe wet tentang pertjerean ada berfaedah bagi rahajat dan marika toeroet boenjinja itoe atoeran dengen betoel, Agama Buddha tida tentangin itoe. Di Java atawa Indonesia djikaloe itoe wet ada berbahaja pada pendoedoek negri dan marika tida ladenin pada itoe atoeran, maka agama Buddha

poen tida tentangin pada itoe perhoeatan jang marfka soedah tida maoe perdoeliken pada itoe matjem wet.

Maka orang-orang jang menglkoetin wet-wet sociaal jang berbedaan samoea bisa tinggal mendjadi Buddhist, dan ini matjem atoeran tida ada terdapat dalem laen-laen agama, dan inilah ada kaindahannja Buddhisme.

Satoe agama jang tida bisa memberi faedah pada sa'antero doenia rata-rata, tida mempoenjai hak aken mengakkoe sabagi agama boeat seloeroeh doenia. Maka tjoemah Buddhisme jang bisa membilang ada djadi agama boeat sageup doenia dan oentoek segala zaman.

Dengen tjara dan alesan seperti diterangkan di atas orang poen boleh blang jang Buddhisme tida menentangin djikaloe kita adaken satoe wet atawa atoeran aken satoe lelaki boleh mempoenjai tiga istri. Memang betoel Buddhisme tida menentangin ini matjem wet djikaloe itoe ada membawa kafaedahan bagi pergaoelan hidoe.

Buddha ada bilang: „Sasoeatoe peladjaran jang mendatengken katentreman dan kapoeasan padamoe, itoelah haroes dianggep sabagi peladjaran jang bener. Sasoeatoe peladjaran jang timboelken kagontjangan dan penasaran padamoe, itoelah moesti dianggep sabagi peladjaran jang keliroe.”

Seperi kita bisa liat denger terang, memelihara tiga istri mendatengken pertjektjokan, gontjangan dan perasa'an tida poeas di dalem familie, maka ini matjem wet tida bisa diterima baek dalem pergaoelan hidoe dari kaoem Buddhist. Bahajanja ini atoeran atawa adat kabiasaan ada begitoe teges pada orang banjak hingga tida perloe boeat saja terangin disini dengen djelas satoe per satoe.

Lakokeken perdjina'an ada satoe kadosa'an sebab kasoedahannja mendatengken kakaloetan dalem familie. Menika dengan tiga prampoean poen mendatengken

kakaloetan dalem familie, dari sebab anak-anak jang terlahir dari darah jang berlaenan tida bisa menjinta dengen begitoe baek seperti soedara betoel, dan marika tida bisa bekerdjā dengan rempoek bersama-sama. Dan seperti saja soedah terangin bahoea natuur soedah persatoeken anggota-anggota dari satoe familie dengen hoeboengan dari darah, dan ada djadi kaingin-annja natuur aken anggota-anggota dari famllie bekerdjā dengan ragem. Maka sasoeatoe wet dari manoesia jang mendatengken kakaloetan antara anggota-anggota dari satoe familie djadinya ada bertentangan dengan wetnya natuur. Dan itoe atoeran menika dengan tiga prampoean moesti dipandang sabagi bertentangan dengan wet natuur, dan oleh kerna itoe tida haroes diantepin dalem pergaoelan hidoepr dari kaoem Buddhist. Itoelah sifatnya ampir sama dengan melakoeken perdjina'an, sebab kasuedahannja itoe doea matjem perboeatan ada ampir saroepa, jaitoe masing-masing mendatengken kakaloetan dan pertjek-tjokan antara anggota-anggota dari satoe familie, dan djoega kadoeanja tida tjetjok dengan djalannja natuur.

Oleh kerna itoe wet atawa adat kabiasaan aken menika dengan tiga istri ada bertentangan dengan pokok dasar dari Buddhisme, jaitoe menerbitken kakaloetan dan perasa'an tida poeas pada kita-orang, maka tida bisa dikasih berlakoe dalem pergaoelan hidoepr dari kaoem Buddhist.

Buddha poenja ampat Kabeneran Moelia.

TENTANG DELAPAN DJALAN OETAMA,
bagian
PERBOEATAN BENER.
XVIII.
OLEH KWEE TEK HOAIJ.

(Lezing dari Batavia Buddhist Association di Klen-teng Kwan Im Tong, Batavia, pada tanggal 7 April 1938 djam 8 sore).

Soedara-soedara,

Di ini malem saja moelai hendak bitjaraken Buddha poenja Delapan Djalan Oetama jang Kaämpat, jaitoe soeal Perboeatan Bener.

Kita soedah liat bagimana itoe Delapan Djalan jang Buddha oendjoekin, ada teratoer menoeroet satoe roentoenan jang amat rapih. Sasoedahnja mempoenjai pengartian jang bener, baroelah orang bisa memikir satjara bener, dan sasoedahnja terbebas dari segala pikiran jang keliroe atawa njasar, pastilah orang nanti bisa bitjara dengan benar jang, menoeroet gitrannja, laloer melahirken perboeatan bener.

Ada banjak orang jang dapet tjelahan lantaran bitjaranja tida tjotjok sama marika poenja perboeatan, atawa tjoemah banjak omong jang bagoes dan enak didenger tetapi perboeatannja nihil, hingga timboel pepatah: „Berboeat ada lebih baek dari bitjara.“ Tap^t inilah boekan lantaran perboeatan haroes lebih di-oetamaken dari omongan, hanja itoe orang jang perboeatannja tida tjotjok sama apa jang ia bitjara, atawa tida perna boektiken iapoerja omongan dengan perboeatan, memang soedah tida bitjara bener, jaitoe tida disertain kadjoedjoeran atawa kasoenggoean hati.

Siapa bisa djalanken dengan betoek itoe Bitjara Bener, jang didasarken atas pikiran dan pengartian

LEZING-LEZING DI KWAN IM TONG.

bener, pastilah nanti lakoeken djoega Perboeatan Bener, kerna saorang jang tida soeka mendjoesta, memboesoekin, memaki atawa omong kosong, tida nanti lakoeken perboeatan salah dan berdosa, oepama menipoe, mentjoeर dan sabaginja lagi. Iapoenna pengartian dan pikiran bener poen bantoe menjegah ta lakoeken perboeatan jang keliroe atawa menjasar dari kabeneran. Maka Perboeatan Bener boleh dibilang ada djadi *woedjoet* atawa *boeah jang kaliatan njata* dari iapoenna *pengartian, pikiran* dan *pembittjara'an* jang serba bener samoea.

Dalem kalangan Perboeatan Bener oleh Buddha ada dioendjoek ampat matjem pantangan jang haroes diperhatiken, jaitoe :

1. Djangan mematiken atawa menjakitken laen-laen machloek berdjiwa. Kasarnja : *memboenoeh dan melaekain*
2. Djangan mengambil apa-apa jang tida dikasih dengen soeka sendiri oleh jang poenja. Kasarnja : *mentjöeri*.
3. Djangan poeashen hawa nafsoe pada lelaki atawa prampeean jang melanggar kabedjikan. Kasarnja *berdjina*.
4. Djangan dahar, minoem atawa isep apa-apa jang bisa membikin loepa ingetan. Kasarnja : *Pemabukan* atawa *pemadatan*.

Soedara-soedara bisa liat, bahoea ini ampat pantangan sabetoelnya tida berbeda seperti diadjar dalem kabanjakan agama atawa peladjaran moraal jang laen. Dengan begitoe kaliatan ini peladjaran aken Berboeatt Bener ada saderhana sekalih, dan malah, saja rasa, ampir segala orang dewasa bisa bilang : „Oh, ini samoea kita-orang soedah taoe, tida perloe diomongin lagi.”

Memang peladjaran jang menggenggем kabeneran oetama kaliatannja saderhana, dan kaloe sekarang saja

moeoe tjoba bitjaraken dan petjahken ini peladjaran, itoelah dari lantaran dalem Buddhisme itoe matjem pantangan jang kaliatannja orang „soedah taoe” ada mempoenjai artian djaoe lebih dalem dan lebih loeas dari-pada apa jang kita kira; toedjoeannja djaoe lebih tinggi dan lebih moelia dari-pada jang disiarin dalem kabanjakan agama-agama laen.

Oepama itoe pantangan kasatoe, jaitoe djangan memboenoeh atawa meloekain. Menoeroet pengartian oemoem, itoe perboeatan tjoemah dipantang soepaja orang djangan memboenoeh atawa meloekain *sasama manoesia*, boeat mana ia boekan sadja bardosa dan membikin moerkanja Toehan hingga rohnja bisa di-djebloesken ka naraka, tapi djoega ia aken dihoekoem oleh wet negri atawa menerima pembalesan dari itoe orang atawa familienja jang ia loekain atawa boenoeh mati. Katjoezi di waktoe perang, atawa melakoeken pakerdja'an algodjo, atawa berkalahi dengen pendjihat, samoea orang taoe bahoea memboenoeh atawa meloekain *sasama manoesia* dengen sengadja ada dilarang, dan malah biarpoen dengen tida sengadja, kaloe ternjata dari koerang hati-hati, oepama tindes orang sama auto, poen bisa djoega dihoekoem.

Tetapi menoeroet Buddhisme itoe perlenggaran tida tjoemah sampe disitoe sadja Itoe pantangan „djangan memboenoeh” boekan tjoemah berlakoe pada manoesia, hanja djoega pada samoea *machloek* jang hidoe, dalem mana ada termasoek segala matjem binatang, dari semoet sampe gadja, dan begitoe poen bangsa tetaneman jang teritoeng hidoe, jang orang tida boleh ganggoe atawa binasaken zonder ada perloenza. Di dalem itoe pantangan poen ada mengenaken djoega masing-masing orang poenja diri atawa toeboeh, jaitoe penganoet Buddhist tida boleh siksa atawa persakit dirinja sendiri, baek dengen satjara fanatiek seperti tertampak antara orang-orang fakir di Hindoestan,

atawa poen dengen djalan masœkin samatjem ratjoen, oepama madat atawa alkohol. Lebih djaoe, saorang jang lantaran terlaloe toeroetin nafsoe birahi bikin toeboehnja dapat sakit kotor, atawa djadi lemah, ia poen teritoeng *melanggar* itoe pantangan, kerna dengan begitoe ia *menjakithen* dirinja sendiri.

Pantangan kadoea, „djangan mentjoeri,” poen ada mengandoeng artian loeas, banjak lebih loeas dari apa jang oemoemnya orang artiken dan jang biasa diterangkan dalem beberapa agama laen. Samoea orang soedah taoe, siapa mengambil barang laen orang zonder idzin atawa soekanja jang poenja, oepama mentjoeri, merampok atawa menipoe, ada besoasa. Tetapi Buddha poenja toedjoean boekan tjoemah sampe di ini wates. Menoeroet Buddha, saorang jang goenaken desekan dan pengaroeh aloes hingga laen orang terpaksa serahin barang jang ia inginken, itoe poen teritoeng *mentjoeri* djoega, sebab itoe pembe-rian boekan atas soekanja itoe orang sendiri. Begitoe poen satoe pendjoedi jang kedoek oewang kawan-kawannja di medja maen, satoe soedagar toekang speculatie, saorang dagang jang naekin harga boekan-boekan atas barang jang orang banjak perloe pake, atawa satoe madjikan jang gentjet pegawenza dengen bajaran sanget rendah soepaja bisa tarik kaœntoeng-an besas oentoek dirinja sendiri, dan banjak lagi laen-laen matjem perboeatan samatjem itoe, menoeroet Buddhisme ada termasoek dalem kalangan MENTJOERI djoega, maski dalem anggepan oemoem itoe perboeatan biasanja tjoemah dikataken kedjem, serakah, atawa pelit, oepama kapan satoe tauwkee membajar pegawenza terlaloe rendah; dan malah satoe pentopan jang bisa dapat kamenangan, atawa toekang speculatie dapat oentoeng besar, dibilang *moedjoer*, *pinter*, *tjerdik* atawa *pande*, tida dipandang djelek.

Pantangan katiga, soeal „perdjina'an,” poen Buddhis-

me poenja toedjoean ada djaoe lebih loeas dari anggepan oemoem. Goenanja perhoeboengan antara lelaki dan prampoean, teroetama ada boeat dapetken toeroenan maka, katjoeali boeat Bhikkhu-bhikkhu, ini kabiasaan jang tijotjok dengen djalannja natuur ada *di-idzinken*. Tetapi orang jang bikin perhoeboengan antara sasama lelaki atawa sasama prampoean, itoe poen dianggep melakoeken perboeatan jang melanggar itoe pantangan, jaitoe jang Bhikkhu Silacara namain „crimes against nature.“ (Melakoeken kadjahatan terhadep natuur). Djadinja boekan sadja mengganggoe orang poenja istri, toendangan, anak gadis jang masih dibawah oemoer, dan sabaginja, ada melanggar itoe pantangan, tapi djoega sasoeatoe perboeatan jang bertentangan dengen wet natuur, atawa poen jang menimboelken sangsara dan kahina'an pada salah satoe fihak, dipandang berdosa atawa *bertentangan* dengen itoe pantangan.

Oepama satoe lelaki dengen satoe prampoean saling menjinta, tetapi iaorang tida menika, hingga koetika itoe prampoean melahirken anak, itoe baji dipandang sabagi „anak haram“ jang tida kataoean siapa bapanja, kerna itoe lelaki tida berani pikoel risico aken akkoein itoe anak, sedeng itoe prampoean moesti menanggoeng maloe, dihina oleh orang banjak. Ini perboeatan poen ada satoe pelanggaran pada itoe pantangan, dan begitoe djoega dengen lelaki jang „menika“ sama satoe gadis atawa „piara“ padanja sabagi goendik, dengen maksoed sakedar aken poeasken nafsoenja, tapi liwat sedikit tempo lantes ditjerèin hingga itoe gadis djadi terlantar. Maski sa'andenja itoe matjem perboeatan *tida bertentangan* sama wet negri, wet agama atawa kabiasaan oemoem, toch menoeroet Buddhisme tinggal *tida baek*, sebab toedjoeannja sakedar *poeaskan nafsoe*, daq kasoedahannja *menjangsaraken* pada itoe fihak jang disia-sia.

Pantangan ka'ampat, soek „mabok,” poen pelajaran Buddha ada lebih loeas dari-pada beberapa agama laen dan anggepan oemoem. Ada agama jang boekan sadja tida melarang orang minoem anggoer, malah ada termasoek pada salah-satoe bagian dari oepatjaranja. Djoega menoeroet anggepan oemoem, orang *boleh* minoem minoeman keras atawa alkohol, atawa isep madat, kaloe sadja bisa „kira-kira” atawa „mengenal wates,” atawa digoenaken sabagi „obat”. Tetapi Buddhisme tida bisa antepin sama ini kabiasaan, sebab apa jang ini hari orang pake tjoemah *sedikit* dan „tida berbahaja”, jaitoe tida bisa membikin mabok, di laen tempo orang nanti gaenaken *banjak kapan* itoe kabiasaan soedah djadi *melèngkèt* dan menimboelken *kemaroek* atawa *ketagian*. Manoesia poenja hawa nafsoe soesah sekalih ditindes dan diwatesin, hingga apa jang sekarang kaliatan tida mengoeatirin satoe apa, laen tempo bisa mendjadi sangat berbahaja.

Itoe pantangan soepaja djangan bikin pikiran mendjadi boetek atawa mabok ada perloe sekalih boeat mendjalanken Pikkiran Boner, sebab saorang jang mabok arak atawa mabok tjandoe, alatnja boeat memikir djadi terganggoe, dan kaloe pikirannja soedah mendjadi boetek atawa gelap, bitjara dan perboean-nja poen tida bisa bener lagi. Dan jang paling penting adalah itoe pengartian, bahoea biar poen jang digoenaken tjoemah sedikit, pengaroehnja itoe minoeman atawa djedjamoe jang tida baek tinggal *berkerdja teroes* dalem kita poenja toeboeh, tjoemah sadja lantaran sedikitnja, tida begitoe kentara atawa tida kena dirasain. Maka orang jang banggain dirinja „tida bisa mabok” maski minoem brandy satengah botol, sabetoelnja tjoemah maoe bilang jang dirinjë sampe koeat boeat tida oesah meringkoek di pinggir straat atawa mengatjo seperti orang gila, tetapi kapan diawasin dengen terliti, lantes tertampak kalakoeannja

jang berbeda dari biasa salagi beräda di bawah pe-nagaroehnja itoe alkohol.

Soedara-soedara, apa jang saja toetoerken sekarang tjoemah baroe keterangan ringkes dari sifatnya itoe ampat matjem pantangan jang perloe dijalanken kapan orang hendak lakoeken *Perboeatan Bener*. Dalem lezing-lezing jang berikoet nanti saja tjoba terangken lagi dengen lebih loeas sampe pada bagian-bagian jang paling aloes atawa soelit. Sekarang saja maoe oendjoek lagi laen soeal jang berhoeboeng dengan *Perboeatan Bener*.

Di datem ini penghidoepan kita sering alamken satoe koetika dimana kita moesti lakoeken satoe perboeatan dengan tjépét dan sebêt, hingga tida dapat koetika tjoekoep boeat menimbang dan memikir pandjang-lebar atawa meminta advies sama orang. Dalem ka'ada'an hegitoë seringkalih djoga orang bersangsi, berlakoe moendoer-madjoe. Djikaloe itoe perboeatan meminta pakerdja'an rame-rame, itoe orang jang bersangsi dan moendoer-madjoe sering menjegah dan menghalangin pada kawannya jang hendak ambil tindakan tjépét, hingga kasoedahannja timboelken perselisihan atawa pertijektiokan satoe dengan laen. Ada banjak orang jang bilang, siapa lakoeken apa-apa dengan *terboeroe-boeroe*, zonder ditimbang dan dipikir sampe mateng, seringkalih bisa *keliroe* dan achirnja djadi *menjesel*. Tetapi djangan diloepta, kasangsian atawa sikap moendoer-madjoe, tida bisa ambil poetoesan sebêt atas sasocatoe perboeatan jang koedoe dilakoeken dengan lekas, paen ada sama djoga djeleknja seperti perboeatan jang gegabah zonder dipikir lagi.

Boeat menjingkir dari ini doeä ka'ada'an jang tida baek, maka saorang jang hendak djalanken *Perboeatan Bener* haroes beladjar boeat memikir dengan tjépét dan bekerdja dengan lekas, tapi boekan dengan

LEZING-LEZING DI KWAN IM TONG.

memboeta atawa satjara gegabah. Ini bisa dilakoe-ken kapan kita selaloe djaga soepaja di dalem itoe perboeatan tida ada terkandoeng apa-apa jang bersifat kouwkati, atawa sedikitnya poen tida didasarkēn oentoek kapentingan goena diri sendiri. Toedjoean kita teroetama tjoemah moesti pikir apa jang paling baek dan berfaedah boeat itoe pakerdja'an jang hendak dilakoeken, atawa tjara bagimana kita haroes bertindak goena itoe orang jang hendak djiptoeloengin, zonder pikir kapentingan diri sendiri, dan djangan timbang pada enak dan tida enaknya itoe pakerdja'an. Kapan ini toedjoean digoenaken sabagi dasar atas itoe perboeatan, kita bisa kerdjain segala apa dengan tjepe^t zonder koea^t keliroe atawa kasalahan jang menimbokken rasa menjesel. Itoe penjeselan atawa rasa kedoeohoeng dari satoe perboeatan tjoemah moertjoel djikaloe kita lakoeken dengan kandoeng sifat kouwkati, akan dapt^e apa-apa jang memberi kaoentoengan atawa kabaekan bagi diri sendiri. Tapi djikaloe ini kainginan tida ada, kita poen tida oesah koqatir nanti hadepken boentoet-boentoet jang tida enak. Sekalihpoen sa'andenja itoe perboeatan tida berhatsil, atawa orang anggep keliroe, masih kita bisa terima dengan tentrem, sebab kita sendiri tida kandoeng kainginan apa-apa. Satoe dokter tida oesah maloe dan menjesel kapan patient jang ia toeloengin tida bisa semboeh dan teroes mati; satoe goeroe tida oesah kedoeohoeng djikaloe beberapa moeridnya tida bisa madjoe hingga tida naek klas lantaran bodonja. Iaorang bisa hadepken itoe pakerdja'an jang gagal dengan pikiran tentrem, lantaran marika soedah lakoeken kawadjibannja sabagimana moesti dengan tida harepken apa-apa dari si fihak sakit atawa itoe moerid-moerid.

Maka dengan ringkes boleh dibilang, toedjoeannja Buddha poenja Perboeatan Bener, jaitoelah perboeat-

an jang tida menjakithen, meroegiken atawa menjvesahken pada laen orang atawa laen machloek jang hidoep, dan tida kandoeng maksoed 'kouwkatii. Berbareng dengen itoe kita moesti tjøba lakoeken perboeatan jang bisa meringanken sasama machloek poenja kasakitan atawa kasedihan, dengen djalan mengasih pertoeloengan menoeroet apa jang kita mamm-poeh atawa sanggoep, boekan tjoemah beroepa oewang, tapi djoega dengen tenaga atawa pikiran.

Kasoedahaninja, seperti soedara-soedara tentoe bisa mengarti djoega, ini *Perboeatan Bener* nanti menjip-taken *kaberoentoengan* dalem doenia, boekan sadja antara manoesia tapi djoega pada *samoea machloek jang hidoep*.

Selamet malem.

XIX.

(*Lezing dari Batavia Buddhist Association di Klen-teng Kwan Im Tong, Batavia, pada tanggal 21 April 1938 jam 8 sore*).

Soedara-soedara,

Apa jang dalem Buddhisme dinamaken *Perboeatan Bener*, dan dalem bahasa Sanskrit dibilang *Samyag Karmanta* dan dalem Pali *Samma Kammanta*, ada dimaksoedken perboeatan jang dilakoeken atas perantara'an toeboeh. Djadinja ini jang ka'ampat dari itoe Delapan Djalan Oetama sasoenggoenja ada jang paling penting, sebab manoesia poenja pengartian atawa kabodoan, pikiran bersih atawa kotor, bitjara bener atawa salah, achirnja moesti berwoedjoet djoega dalem *perboeatan*, dan dengen itoe perboeatan ia bisa bikin laen-laen orang djadi beroentoeng atawa tjilaka, bergirang atawa sedih, mendongkol atawa senang, pensaran atawa pœas, oentoeng atawa roegi, dan laen-laen lagi.

Pembitjara'an jang njasar atawa djahat, pikiran jang

tida baek, dan pengantian jang keliroe, memang bisa djoega menjoesahken pada sasama machloek, terkadang dengan sama djoega heibatnja sabagi perboeatan jang berdosa. Tetapi kadjahatannja itoe jang tiga tida begitoe langsoeng seperti manoesia poenja *perboeatan*. Orang boleh pikir segala roepa jang tida baek tentang laen orang, boleh omongan boesoek pada moesohnja, tetapi sabagitoe lama itoe pikiran dan omongan tida diwoedjoetken dengan perboeatan — kaloe tjoemah baroe diaoer diam-diam atawa hanja mengantjem sadja — masih tida begitoe berbahaja seperti djikaloe soedah dilakoeken dengan pierboeatan. Dan oleh pengadilan tida bisa dihoekoem kaloe orang baroe *pikir* sadja aken berboeat djahat, dan siapa bitjara jang tida baek, oepama memfitenah, membœsoekin atawa memberi maloe pada laen orang, kapan boekan di moeka oemoem, djoega tida bisa dihoeekoem. Satoe orang bisa tinggal sabar dan tida perdoeli pada iapoenja moesoeh jang ia taoe ada kandoeng pikiran tida baek dan sering bitjara djahat tentang dirinja. Tapi djikaloe itoe moesoeh oendjoek *habentjiannja* dengan perboeatan, oepama memoekoel, meloadhin dan sabaginja, saorang jang pendiam dan tida soeka riboet bisa djoega menjadi nekat, atawa sedikitnya bikin pengadoean pada politie.

Boeat orang-orang biasa ada amat soeker aken kennalin apa jang ada mengêrem di dalem batin manoesia. Orang poenja tabeat bisa djoega diliat sabagian dari iapoenja omongan ; tetapi sifatnja omongan masih bisa menjesetken dan menimboelken salah mengarti. Ada djoega orang jang bilang, „Si Anoe moeloetnja djahat tapi hatinja baek.” Oepama Madame Blavatsky, pendiri dari Theosofie, tabeatnja brangasan dan sering bitjara keras pada orang, tida perdoeli sobat atawa moerid moeridnja jang paling rapet, jang ia sering damprat dengan perkata'an tadjem dan ketoes. Tapi

orang jang kenal tabea'nja tida djadi goesar atawa mendendem, sebab taoe hatinja ada baek dan moelia, perboeatannja bersih dan bener. Djoega dalem hal bitjara, sering sekali terjadi salah mengarti atawa orang bisa artiken delek maski djoega itoe omongan ada baek dan berafaedah. Di doenia ada amat banjak orang-orang bodo jang kapan diberi nasehat atawa peringatan jang baek boekan merasa girang dan soekoen hanja berbalik *membentji* atawa merasa goesar pada itoe sobat atawa familie jang menasehatin. Djadi'nja perboeatan jang dilakoeken oleh omongan, oleh lidah, masih tida begitoe djelas dan menjolok seperti jang dilakoeken oleh *toehoeh*. Lantaran begitoe sa-orang djahat dan chianat jang kandjoeng segala pikiran boesoek, kapan bisa bitjara manis, ia poen sering mendapat pengharga'an dan kahormatan atawa kaper-tjaja'an dari sobat-sobatnja atawa dari orang banjak. Tjoemah djikaloe itoe kaboesoekan soedah kataaoean dari iapoenna *perboeatan*, baroelah topengnya terlotjot dan orang dapat liat atawa mendoesin bagimana sifatnja jang bener.

Maka boeat orang-orang biasa, golongan jang kabanjakan, itoe Perboeatan Bener ada paling didjaga, boekan sebab marika tjinta pada kabeneran, hanja kerna marika insjaf, perboeatan jang tida bener, kapan kataaoean oleh orang banjak, ada sanget tida enak dan *merœgiken* pada dirinja. Maka itoe sasoeatoe orang jang ada poenja sedikit sadja katjerdikan, selaloe berdaja aken bikin soepaja perboeatannja, di moeka orang banjak, kaliatannja *bener*, biarpoen sakedar boeat *poera-poera* sadja.

Ada beberapa gelongan bangsa biadab, oepama orang Dajak atawa Papoewa, jang pandang kapan bisa memboenoeh orang-orang dari laen kaoem jang bermoesodh, ada satoe kahormatan. Pamoeda-pamoeda jang hendak menika moesti mempoenjai beberapa

LEZING-LEZING DI KWAN IM TONG.

kepala orang, jang ia boenoeh sendiri, sebab dijikaloë tida begitoe nistjaja tida ada gadis jang maoe djadi istrinja. Perhiasan jang paling diboaat bangga oleh beberapa soekoe bangsa Dajak atawa Papoewa, jaitoelah kepala orang jang marika daper boenoeh, dan diganteng dalem roemahnja, atawa dalem kampoeng-nja, dan kaloe poenja lebih banjak ada lebih baek lagi.

Tapi boeat golongan manoesia jang soedah sopan, itoe matjem perboeatan nedjem tida dilakoeken lagi, sebab sanoea soedah mengarti kadjahatannja. Tetapi biarpoen antara bangsa-bangsa jang terkenal sopan dan madjoe, ada banjak djoega orang jang merasa bangga kapen soedah bisa binasaken beberapa orang jang menjadi marika poenja moesoeh. Di mana-mana ada banjak kepala-kepala rampok, badjungan atawa gangster seperti di Amerika, jang ditakoetin dan dimaloein lantaran banjak orang telah djadi korbannya. Dalem permoesohan prive, oepama aken membales sakit hati, atawa membela kahormatan diri, satoe pemboenoeh terkadang dipoledji dan dikagoemin oleh publiek, dan malah dalem perkara membela diri atawa membela kahormatait, ada djoega persakitan-persakitan jang dibebaskan oleh pengadilan.

Sampe beberapa blas taon laloe dalem kalangan pergaoelan Tionghoa masih ada Toako-toako pakoempoelean jang dihormat dan dimaloein orang, lantaran terkenal mempoenjai sadjoemblah toekang keproek jang bersedia aken bikin botjor kepalanja orang-orang jang berani menghina atawa menentangin poetoessannja itoe pemimpin. Semingkin banjak orang jang ia bisa kirim ka acherat atawa ka hospitaal, itoe Toako poenja pengaroeuh semingkin besar dan orang semingkin taro endah, kaloe sad a itoe korban-korban memang dianggep „salah”. Ada beberapa journalist Tionghoa di Java jang soedah alamken kepala petjah atawa serangan satjara menggelap, dan fihak jang kasih

oepah pada toekang-toekang keproeck akèn lakoeken itoe penjerangan menggelap, tida selamanja dipandang rendah atawa boesœk.

Saja seboet ini samoea sakedar mengoendjoek boekti, bagimana boekan sadja antara bangsa-bangsa biadab, hanja dalem golongan jang terkenal *sopan* poen itoe perboeatan memboenoeh dan melookaken masih ada banjak jang tida dipandang sabagi kadjahatan oleh anggepan oemoem. Malah kaloe jang diboenoeh boekan manoesia, boekan sadja sama sekalih tida dipandang berdosa, hanja ada banjak djoega jang *diboeat bangga* atawa *dikagoemken* orang. Oepamanja, seringkalih orang billang :

Si A bikin pesta besar, soedah potong lebih dari *doea ratoes ekor ajam dan bebek*, atawa speciaal potong *lima ekor babi*, atawa *doea sampi* atawa *sapoeloech kambing*, dan sabaginja lagi. Antara orang priboemi di padesa'an kaloe bisa bikih pesta dengen „potong kerbo“, namanja djadi kesohor, sebab menoendjoekken itoe pesta ada sangat besar dan rame!

Banjak orang jang gemer memboeroe, menembak boeroeng atawa menangkep ikan, biasa toetoerken dengen bangga kapan berhatsil bisa boenoeh sakean babi-oetan atawa mandjangan, beberapa poeloeh ekor boeroeng, atawa dapat tangkep sakean banjak ikan jang besar. Dalem beberapa tijdschrift sewing dimoeat gambar dari pemboeroe, penembak boeroeng atawa pemantting iléan, jang dipotret bersama itoe binatang-binatang jang djadi korbanja. Satoe pemboeroe jang sengadja pergi ka Afrika atawa India, boeat tembak singa, maijan, badak, gadja dan laen-laen binatang liar jang besar, seringkalih diwoedja sabagi pendekar jang gagah berani! Iaorang sama sekalih tida pikir kadjahatanja memboenoeh atawa menjikitken pada sasama machloek. Dengan pake alesan „sport“ dianggep pantes dan sah aken membina saken itoe bi-

LEZING-LEZING DI KWAN IM TONG.

natang-binatang jang tida berdosa, dan banjak djoega jang tida perna mengganggoe pada manqesia, oepama itoe boeroeng-boeroeng dan ikan-ikan, atawa binatang-binatang kaki ampat jang ejinek.

Dengan begitoe, soedara-soedara, kita-orang bisa lat, bagimana itoe pelajaran dari Buddha tentang „djangan memboenoeh atawa menjakitken“ pada sama machloek jang hidoe, sabetoeinha boekan sad a belon dimengarti, tapi djoega oleh golongan jang soedah taoe, ada amat soesah boeat didjalanken dengan betoel.

Oleh golongan badjungan, perboeatan memboenoeh atawa poen meloekain dipandang sebagai satoe kamoesian kapan ingin pakerdja'nnja, boeat merampas si korban poenja millik, bisa berhatsil bagoes. Kita djangan pandang itoe tjingli dari kawanan badjungan tida haroes dianggep, sebab marika ada golongan berbatin sanget rendah, kerna sekarang, boleh dibilang di depan kita poenja mata, soedah ada doe bangsa besar jang mengakkoe „sopan“, tida djidji djalanken pemboenoehan heibat pada doebsngsa laen jang lakoeken perlawanan, tida soeka kasih negri dan kamerdika'nnja dirampus. Dan jang paling tjlaka, kapan itoe perampokan soedah berhatsil, itoe fihak jang bisa rampas laen bangsa poenja negri, akèn dihormat dan di-endahin oleh seleroeh doenia !

Banjak negri jang doeloe dijalankien sanctie pada Italie sekarang soedah akkoe Radja Italie sebagai „Keizer dari Ethiopie,“ dan malah kabarnya tida antara lama Engeland bakal madjoeken voorstel pada Volkenbond boeat akkoe kakoeasa'an Italie atas Ethiopie.

Saja oendjoek ini hal sakedar momboektiken, itoe tjingli dari kawanan rampok akèn binasaken toeana roemah jang berani melawan waktoe miliknya hendak dirampus, sabenernja boekan perboeatan kedjem toebar biasa, kerna biasa didjalanken djoega oleh bangsa-

bangsa besar terhadep tetangganja jang lebih lemah.

Boeat golongan orang biasa jang boekan termasoek badjingan, jang djidji boeat merampok, masih banjak jang pikir „tida djahat“ kapan memboenoeh atawa meloekain pada orang-orang jang djadi moesoeoh pri-ve, tjoemah sadja dipandang *bodo* kaloe itoe pem-balesan sakit hati dilakoeken satjara kasar sampe ia kena masoek dalem boei. Saorang jang bisa mem-bales pada moesoehnja dengen djalan „aloes“, hingga itoe moesoeoh djadi mampoes atawa berobat di hos-pitaal dalem tempo lama, zender si pemboenoeh atawa penjerang dapet dibekoek oleh politie, itoelah dipandang „tjerdik“, dan oleh sobat-sobatnya sering dipoedji dan dikagoemin katjerdikanja !

Golongan jang tida soeka membales sakit hati pada moesoehnja, jang tida soeka lakoeken pemboenoehan atawa penoempahan darah maski dihina katerlaloean, seringkali oleh orang banjak dikatalin „pengetjøet“ atawa „boekan lelaki“ ! Dengan begitoe kita bisa lihat, pakerja'an memboenoeh dan menoempahken darah boekan sadja seringkalih tida dipandang djelek, malah dalem beberapa hal dianggep sabagi satoe *ku-moestian* !

Memang menoeroet anggepan oemoem, antara orang-orang biasa, dan malah djoega antara beberapa kaoem jang soedjoet betoel pada agamanja, soal bergelet dan bekakahi, jang terkadang disertaken penoempahan darah hebat, ada dipandang perloe atawa satoe kamoestian kapan moesti melawan pada kadja-hatan, kahina'an atawa membela kahormatan, kaper-tjaja'an dan kabeneran. Tetapi antara itoe orang-orang jang tjoemah melawan boeat membela diri, jang tjinta pada kabeneran, jang sasoeenggoehnja membentji pada kadjahatan, banjak jang merasa tèga meliat pem-boenoehan atawa piengenjaja'an pada machloek-mach-loek jang lemah dan tida berdaja, pada binatang-bi-

LEZING-LEZING DI KWAN IM TONG.

natang jang diboenoeh atawa dilokain dalem pemboeroean, boekan sebab si pemboeroe kelaparan dan ingin dahar dagingnya, hanja sakedar boeat *plesier*!

Orang adaken pakoempoelan Dierenbescherming Pelindoeng binatang soepaja djangan disiksa, hingga satoe koetsier sado atawa toekang grobak jang pake koeda letjet banjak jang dapet hoekoeman denda; tetapi iaorang tida tjegah pemboeroe-pemboeroe menimbakin binatang-binatang oetan, antara mana ada banjak jang sasoedah kena ditembak tida lantes mati, hanja bisa lari semboeni, dan moesti tanggoeng sangsara beberapa hari sebelonnya itoe loeka djadi boesoek dan bikin poetoes djiwanja. Banjak boeroeeng betina jang anak-anaknya masih belon bisa terbang, soedah kena ditembak, hingga itoe anak-anak di dalem sarang mati kelaparan!

Djarang ada orang jang merasa ketarik kapan meliat satiap hari ada begitoe banjak binatang piara'an jang djinek telah dikirim ka djagal atawa disembeléh dalem pekarangan roemahnja tjoemah boeat poeasken iapoenna lidah. Beberapa agama malah pandang sadjian binatang atawa sam-sing ada satoe oepatjara jang penting, sedeng soeal manoesia dahar daging binatang ada dipandang sabagi satoe *kamoestian*, satoe *hak* jang soedah *ditdzinken* oleh Teohon. Djadinja itoe pantangan aken „djangan memboenoeh sasama machloek berdjiwa“ dari Buddha tiada perna ditoeroet oleh kabanjakan orang biarpoen jang termasoek pada golongan „baek-baek“ dan „membentji kadjahatan“.

Saja oendjoek ini samoea sakedar boeat kasih liat bagimana loeas dan tinggi itoe pantangan „djangan memboenoeh“, hingga kal atannja amat soeker, malah dalem banjak golongan *tida bisa* ditoeroet dengan betoel, biarpoen oleh kaoem Buddhist sendiri.

Boeat golongan jang perhatiken Buddhisme dalem tingkat rendah seperti kita-orang samoea, jang ma-

sih tentoet penghidoepan satjara biasa, memang tida bisa aken lantes toeroet sapenoehnja itoe pantangan boeat djangan memakan daging, apalagi kaloe di-djalanken satjara mendadak. Seperti Bhikkhu Narada doeloe perna otendjoeckin, bermoeolah orang moesti moelai aken djangan potong ajam atawa laen-laen dalem roemahnja, hanja beli sadja apa jang soedah tersedia di pasar. Komedian kita-orang djalanken tjiatjay dalem tempo-tempo jang tentoe, oepama satiap tjee-it atawa tjap-gouw. Dengan perlahan kita biasain aken dahar lebih banjak sajoeran dari-pada daging-daging. Berbareng dengan itoe kita-orang djangan pergi memboeroe, menembak boeroeng atawa menangkep ikan, dan djoega djangan piara binatang jang dikoeroeng, seperti boeroeng-boeroeng jang ditaro dalem koeroengan tjoemah boeat perhiasan atawa aken didenger soearanja, sebab dengan begitoe kita *siksa* padanja dan *rampas* kamerdika'annja.

Terhadep binatang jang meroesak, oepama djikaloe di dalem kita poenja roemah kadapetan oeler berbisa, kaladjengking, atawa sarang rajap jang naek ka dalem kita poenja lemari boekoe atawa tempat pakean, begitoe poen semoet jang kroeboetin makanan, atawa lantja jang bersarang di segala podjokan, soedah tentoe moesti dimoesnaken. Disini boekan termasoek *kakедеман* ingin memboenoeh, hanja *melindoengin diri*, familie dan milik dari pagoetannja itoe oeler dan dari ganggoeannja itoe binatang-binatang ketjil. Sabagi kepala dari roemah tangga kita ada poenja kawadijiban aken mendjaga soepaja itoe roemah jang kita tempati tida djadi mesoem sama sarang lantja, sama rajap, semoet dan segala matjem koetoe. Ini tida berbeda dengan kawadjibannja orang politie jang membersihken negri dari ganggoean perampok, atawa satoe generaal jang kapalaken tentara boeat tolak serangan moesoech. Maka kapan kita poenja tetaneman

LEŽING-LEŽING DI KWAN IM TÖNG.

diganggoe oleh tjelèng, atawa binatang piara'an diserang matjan, ada djadi kawadijiban kita aken oesir dan, kaloe perloe, binasaken itoe pengroesak. Tetapi kita djangan *sengadja* pergi ka oetan boeat boenoeh binatang-binatang jang tida mengganggoe orang, biar poen jang teritoeng „boeas.”

Soeal „djangan memboenoeh” oleh Buddha tida perna dikokkoehin hingga bersifat gendeng atawa fanatiek. Koetika salah satoe Bhikkhu moeridnja dapet taoe, dalem aer jang soedah disaring soepaja koetoe-nja tida mati kaloe itoe aer diminoem, masih kada-petan banjak koetoe-koetoe aloes jang molos dari itoe saringan, dan laloe tanja pada Buddha bagimana ia haroës berboeat, Buddha menjaoet: — „Kaoe boleh minoem sadja itoe aer, sebab kaoe soedah penoeh-ken pendjaga'an aken loësken itoe koetoe-koetoe dari kamatian dengen pake itoe saringan.”

Djadinya boekan *pemboenêhannja*, hanja *tjaranja*. jang perloe aken diperhatiken.

Kaloe satoe orang salagi berdjalan kena indjek sarombongan semoet sampe mati, iapoën terbebas dari kadosa'an. Kapan satoe toean roemah moesnaken sarang rajap deket lemarijnja, iapoënja toedjoean boekan *sengadja* hendak ambil djiwanja itoe binatang aloes.

Soeal djangan bikin mati poehoen-poehoenan dijaloe tida ada perloenja, itoe poen teritoeng **satoe** peladjaran jang mengäloesken orang poenja pikiran dan pengrasa'an. Kita-orang seringka lih kenalin beberapa poehoen, di deket siapa kita biasa memaan di waktoe masih anak-anak, dan sanget menjesel kapan meliat itoe poehoen ditebang. Ada banjak poehoen boeah atawa kembang jang soedah lama me-noemboe dalem kita poenja pekarangan, jang kita-orang biasa rawatin soepaja bisa hidoeper teroes, dan merasa sajang koetika meliat ia djadi lajoe atawa

mati. Di mana-mana negri ada dipelihara samatjem park atawa natuur monument dimana sabidang tanah loeas dengen oetan besar dibiarken sabagimana adanya, tida boleh diganggoe. Oetan begitoe di Djawa Keloen ada kadapetan di Depok, deket Bogor, dan di Pelaboean Ratoe.

Ada banjak anak-anak jang, kaloe memaan di kebon, dengen zonder pikir telah tjaboet atawa tabas sama golok beberapa poehoen, tjoemah lantaran iseng tangan. Inilah ada perboeatan jang sama djoega tida baeknya seperti meroesak sarang boeroeng atawa membina saken tjapoeng, balang dan sabaginja zonder kaperloean satoe apa.

Antara kaoem vegetarier jang hendak djalanken dengen betoel itoe pantangan aken djangan memboenoeh machloek berdjwa, ada djoega jang tida maoe dahar katjang, bawang, beras dan sabaginja jang kapan diambil atawa digali, poehoennja moesti ditjaboet atawa dipotong hingga djadi mati. Marika lebih soeka dahar boeah-boeah, oepama kelapa, dje-roek dan laen-laen, jang kapan boehnja dipetik, poehoennja tinggal idoep teroes, tida terganggoe sama sekalihih.

Tetapi foedjoean jang bener dari itoe pantangan „djangan memboenoeh sasama machloek jang hidoepl,” seperti tadi diterangkan, boekan tjoemah moesti dipandang dari orang poenja perboeatan sadja, hanja jang teroelama ada dari laopenja maksoed dan toe-djoean. Oepamanja, djikaloe dengen sagep hati kita soedah insjaf dan merasa tida baeknya membina-saken sasama machloek, dan saberapa boleh kita djaga soepaja djangan memboenoeh, tetapi di satoe waktee kita dahar daging atawa ikan lantaran disoegoehin oleh laen orang, atawa sakedar hendak bikin senang hatinya kita poenja kawan, itoe perboeatan tida bisa dibilang salah. Buddha sendiri katanja soedah perna

Philosofie Buddhist tentang Kalahiran dan Kamatian.

OLEH BHIKKHU NARADA.

KATERANGAN DARI REDACTIE.

Sakean lama ini maandblad tjoemah di-isi dengen lezing-lezing tentang Sam Kauw dan kabar dari pergerakan jang berhoeboeng dengen itoe.

Akem tetapi maskipoen lezing-lezing jang dimoeat disini selaloe dipilih dengen terliti, toch tida di satiap nomor kita bisa sadijken jang paling baek dan paling tjoetjok.

Ada banjak pamoeka-pamoeka Buddhist, oepama Bhikkhu Narada, jang lantaran kita tida bisa dapet verslag dari lezing-lezingnya jang dibikin di Ceylon, soedah lama tida kadengeran seroohan dan chotbah-chotbahnja dalem ini madjallah.

Sedeng begitoe di dalem kita poenja rak boekoe ada bertoempoek sadjoemblah madjallah Buddhist jang diterbitken di Ceylon, India, Engelnd dan laen-laen tempat, dan jang sasoeatoe lembarannja ada penoeh dengen keterangan-keterangan sanget berharga tentang Buddhism, dan ditoelis oleh achli-achli Buddhist jang ternama, tetapi sampe sabagitoe djaoe belon perna disalin ka dalem bahasa Melajoe.

Oleh kerna itoe maka moelai dari ini nomor ka-49, jang djadi permoelahan dari taon ka-5, kita menjimpang sedikit dari itoe toedjoean jang lama dengan

dahar daging babi-oetan sedikit tempo sabelonnja meninggal doenia, jang disoegoehin oleh salah-satoe penganoetnja. Maka jang paling penting ada itoe kasedaran dan pengartian, atas tida baeknja memboenoeh dan menjakitken basama machloek jang hidoe dengen sengadja, dan berdasar atas *kakedjeman* atawa *kabodoan*.

Selamet malem.

moeatken djoega salinan dari artikel-artikel tentang Sam Kauw, teroetama Buddhisme, jang ditoelis oleh pamoeka-pamoeka jang ternama, dan sabagi permoeila'an kita sadijken salinan dari toelisannja Bhikkhu Narada jang perna dimoeat dalem madjaitlah *Peace* penerbitan taon 1932.

Dengen ini tjara, maskipoen Bhikkhu Narada soedah lama tida koendjoengin poelo Djawa lagi, pembatja dari ini orgaan masih bisa teroes terima pikiran, keterangan dan peladjarannja, hingga dengen begitoe-satoe kakoerangan jang soedah lama dirasain sekarang dapat dipenoehken.

Itoe artikel-artikel jang berätsal dari salinan, boekan meloeloe Buddhisme sadja, hanja kapan kabetoelan dapat jang tjoetjok dan tida terlaloe pandjang, kitaaken moeat djoega jang membitjaraken Khong Kauw, Too Kauw dan laen-laen peladjaran philosefte jang berhoeboeng dengan itoe, dan dipilih dari toelisannja orang-orang pande. Tetapi itoe salinan diwatesken satiap nomor tida lebih dari satoe artikel, soepaja halaman boeat tempatken lezing-lezing tida menjadi tjoet.

Toelisannja Bhikkhu Narada dengan kalimat seperti di atas berboenji begini:

Jang kalahiran mendoeloein kamatiian, dan sabaliknja lagi, kamatiian mendoeloein kalahiran, inilah ada salah-satoe dari pokok peladjaran jang teroetama dari Buddhisme. Ini sifat jang tetep dari saling bergantinjanja kalahiran dan kamatiian dalem perhoeboengan dengan masing-masing orang poenja djalan kahidoepan, ada meroepaken apa jang satjara philosophie dinamaken *Sansara* (Sanskrit: *Samsara*), jaitoe: *djalān mengider beroelang oelang*.

Maka sekarang ada ditanja: apakah jang menjadi pokok permoeila'an jang pasti dari itoe *Sansara*? Atawa dengen menggoenaken laen perkata'an: Apakah

PHILOSOFIE BUDDHIST TENTANG KAMATIAN

poko permoela'an jang paling pertama sekalih dari kahidoepan? Inilah ada satoe pertanja'an jang membingoengken ingetannja sasoeatoe djoerœ-pemikir jang pande. Penjaoetan jang diharep masih belon bisa didapet biarpoen itoe hal soedah menarik perhatiannja samoea orang jang memikir dalem, dan tida bisa dikataken katerlalœan kapan dibilang bahoea amat boleh djadi tida ada jang sanggoep memberi djawaban memoeasken.

Goeroe-goeroe kabatinan Hindoe jang berpengarutan tinggi jang digelar R'sis soedah kaloearken amat banjak tenaga dan kagiatan dalem pakerdja'annja boeat fahamken ini soeal dari kahidoepan. Tersasar dalem libetannja penjesatan dari sang maya, marika soedah timbang dan saring apa jang dinamain boekti-boekti dari itoe doega doega'an jang tida berdasar tentang apa jang disangka "sang diri", dan achirnja menarik poe toesan bahoea permoela'an dari kahidoepan ada berätsal dari satoe tenaga atawa kakoeasa'an resia jang diseboet Paramatma.

Golongan Kristen, dalem perijoba'annja boeat memberi satoe keterangan, telah pandang segala apa ada berätsal dari kamaoeannja satoe Toehan jang Maha Koeasa.

Dengan memberi kahormatan penoeh pada pengadjarannja Kristus, soedah tjoekoep aken diseboet sadja apa jang Schopenhauer ada bilang, bahoea "kalahirannja satoe binatang dipandang sabagi moentjoei dari barang jang tida ada, dan dengan berdasar atas ini kapertjaja'an, kamatiannja poen moesti dipandang djoega sabagi satoe kamoesna'an jang sampoerna, samentara manoesia jang djoega permoela'annja ada dari kanihilan, tapi toch mempoenjai penghidoepan jang berdiri sendiri, sabenernja ada satoe barang terhadep siapa itoe segala penoetoeran tentang atsal-oetsoelnja membikin orang-orang berpikiran sehat

"jadi berontak, kena itoe samoëa moesti dipandang sabagi omong kosong jang tida masoek di akal."

Tida teriket oleh samatjem kapertjaja'an agama, terbebas dari segala anggep-anggepan koekoeh, meloeloe mengandel pada pertimbangan jang panes dan sehat, kalangan wetenschap jang modern telah bertindak madjoe ka moeka aken tjoba petjahken itoe soeal dengen lakoeken, seperti kabiasa'annja, pepereksa'an jang djelas dan satjara pande. Beserta pengataoeannja jang teratoer dengen rapih, kalangan wetenschap masih boleh dibandingken sadja dengan satoe anak ketjil, jang lagi tjoba lakoeken pepereksa'an boeat pertama kalih pada penghdoepan dari segala machloek berdjawa. Maski begitoe dengen girang kita menjamboet kadatengannja achli-achli wetenschap di tengah kita-orang (kaoem Buddhist) sebab itoe golongan tida perna mengakkoe pengartiannja soedah tjoekoep sampaerna, dan tida pandaing sabagi perboeatan jang menghina pada kasoetjian djikaloe ada orang jang mempoenjai kaberanian aken tentangin anggep-anggepan-nja. Bagi satoe djaman, atawa lebih betoel satoe bangsa, jang perlaja dengen keras tentang penjipta'an jang dikerdjaken oleh satoe Toehan jang mempoenjai Kakoeasa'an Tida Berwates, itoe theorie-theorie dari fihak wetenchap, bahoea kahidoepan poenja atsal-oetsoel ada dari djaman koeno jang tida bisa dioekoer djaoenja, dan bahoea manoesia ada dari samatjem monjet jang hidoepl di tanah dan djadi tambah madjoe sabagi tertampak sekarang, inilah sasoenggoenja ada satoe pengganti jang berharga.

Buddhisme dateng menjelak dengen djiroe sekalih membilang. „Itoe Sansara tida ada permoeela'an dan pengabisannja. Sasoenggoenja tida bisa didjadjakin permoeela'an dari itoe machloek-machloek jang terlipot oleh kabodoan dan kena terdjiret oleh rasa aoes pada kahidoepan, jang berdjalan teroes salama-lamanja pada

PHILOSOFIE BUDDHIST TENTANG KAMATIAN.

kalahiran-kalahiran jang baroe."

Lebih djaoe kaliatannja Buddhisme memberi nasehat pada orang-orang jang dengen giat hendak mentjari kabeneran, dengen berkata: „Pamoeda-pamoeda sobatkoe, djangan tjapein pikiranmoe boeat mengoesoet dengen sia-sia itoe permoela'an dari tempo doeloe jang tida ada permoela'nnja.”

Djikaloe kahidoepan ada barang jang berdiri terpisah sendirian, memang perlœ ia ada mempoenjai pokok permoela'an. Tetapi penghidoepan, djikaloe hendak dibilitjaraken dengen sabenernja, ada satoe aliran atawa gerakan tenaga seperti elektris atawa kakoeatan tarik-menarik, dan dalem ini sifat, ia poen tida mempoenjai permoela'an atawa pokok dasar dari tempo jang laloe. Apa kaoe ada toeroenan dari monjet jang hidoep di tanah, ditjiptaken oleh Toehan atawa oleh Brahma, kaoe poen tida bisa terlolos dari kalahiran, kamatian dan kasakitian, kasangsara'an mana samoea machloek lama-lama moesti kena rasain djoega.

Maka itoe paling betoel orang haroes tjari sebabnya kenapa ia kena terlibet teroes dalem itoe lelakon tida enak, jang mendjadi bagiannya samoea manoesia, dan laloe goenaken tenaga dan kagiattannja boeat simpangin itoe aliran kahidoepan ka dalem itoe ka'adaan jang membikin ia terbebas dari kadoeka'an dan dapetken penoeh katentreman, itoe Nirwana.

Bagi kaoem materialist jang gemer mendoega-doega tjoemah boeat adoe kapinteran, ini perikata'an tentoe sadja tida ada goenanja. Tetapi sikep begitoe tida saberapa pengaroehnja bagi Buddhisme. Oedjar-oedjar dari Buddha tjoemah ditoedjoeken pada itoe soedara-soedara jang tertindes kadoeka'an, pada siapa itoe Dharma ada menjadi satoe kaperloean. „Dharma ada sebagai obat pait jang tida saorang jang tjerdkik nanti maoe minoem katjoeali djikaloe terpaksu oleh kaperloean.”

(Jang mendatengken kaperloean jaftoelah kadoeka'an dan kasedihan. — K. T. H.).

(*Ada berikoetnja*).

Kabar Pergerakan Kabatinan.

OPENBARE LEZING DI BOEN BIO SOERABAJA.

Seperti soedah diwartaken dalem ini orgaan dari boelan jang laloe, Comite dari Boen Bio Soerabaja soedah organiseer satoe afdeeling boeat menjiarken Khong Kauw. Pada tanggal 8 September telah dibikin openbare lezing jang pertama dengan dihadirlir oleh kira-kira 80 orang, dipimpin oleh Toean Tan Sioe Hie, jang menerangkan itoe matjem pertemoean openbaar aken diadaken teroes satiap tanggal 15 Imlek.

Dalem itoe pertemoean telah bitjara Hoedjin Ong Hong Hing tentang pendidikan, Siotzia Tjoa Hiem Nio tentang pendidikan pramroe'an, dan Toean Ong Hong Hing tentang Khong Kauw dalem Padvinderij.

Pada tanggal 18 September afdeeling Khong Kauw Hoe Lie Hwee Soerabaja telah bikin pertemoean pertama di Boen Bio dengan dikepalain oleh Hoedjin Ong Hong Hing dan dikoendjoengin oleh banjak orang pramroe'an dan lelaki, dalem mana dabitjaraken tindakan boeat mengadaken pendidikan goena orang pramroe'an dalem pakerdja'an mengoeroes roemah tangga dan fahamken peladjaran Khong Kauw dengan satiap hari Minggoe sore dari djam 4 sampe 6 diadaken cursus dalem Boen Bio. Lebih djaoe telah diangkat beberapa hoedjin dan Siotzia aken djadi bestuur dari itoe afdeeling.

BATAVIA BUDDHIST ASSOCIATION.

Di bawah ini ada tjatetan dari lezing-lezing di Kwan Im Tong Batavia jang aken dibikin selama boelan October 1938.

6 October. Kwee Tek Hoaij: Soeal Buddha poenja Delapan Djalanan Oetama, tentang Melakoeken Pertjo-baan Bener.

20 October (27 Peegwee): Beberapa persama'an dalem peladjaran Khong Tjoë dan Buddha.

13 dan 27 Oct. R. Soekirlan atawa R. Soetardjo:

PERGERAKAN ISLAM HONDORIA
Pendiriannya Kristen pada Buddhaisme dan Islam yang
berhubungan dengan itu

Ditularkan seolah lamu ada di bawah tulisan Persatuan
Islam-Tionghoa yang dikenal sebagai "Hari Ming Haoyi"
Kauw Huo Hoqibesuturunia ada terdiri dari
tujuh-tujuh Lien Kie Che, Yip Kiem Chai, Maek Chai
dan A Rasiid. Sekitarung itu Loan-toean lagi bikiin
perjalanan di Sumatra tercetus ke Jawa. Di Palembang
Klauw Oen Tong Sia dan adakken Recepthe di Gedong Hos
sergaedeling di Gedong "Oranje", dan di Batavia da
Oecmopelan-Pakoeempelan selama lundunceler sedah
adakken comlike pecijambocoetan boekel kedatengamme
Dioegs itu Pakoeempelan sedah terdiliken saloa
madjalah yang diuamain Hikmat di bawah pimpinan
Loan Lhm Kie Che, dihidrohien salap Boedan boera
menjelirken Agama Islam.

Kita masyarakat int kabaran sahadeb boeket kastih lal
semadjoanze gejadian dat orang Tiooghoe jang ber
Dengen membanding baajak tima kastih kita sedah
trima krumaan oewang boekel macabajar abounement
Sam Kauw Gwi Po dari toean-toean jang terapebel
di baweh lui:

Too Feen Shong, Lo Pi Siem, a 1150
Njoo Blauw Wan Merw, Tjan Dje Twan dan Ong

dong luq, a 1075
Penehman di atas sampe sebit September 1938
Pembelaan jang di a kop dengen Mocstra Dhar
wa aliwa. Mocstra - - - - - ada dimaloemkou ulam
laoe masiling-masing mandibad sendiri. Pembelaan
jang dengen posikwanahe, agenu alawa teknologi

looper dia di dimulainya

N.V. BATAVIA BANK

Terdiri 1918
Asemkade 22-23,
Batavia.

Memberi crediet voor
perdagangan
Trima Giro dan Deposito.

Type Drukkerij Meentha, Leiden 1920